

DM&R MINISTER

Disaster Management and Rehabilitation Minister Prof Lalnilawma'n Mizoram chhungah furpui chhunga chhiatna tamzawk pumpelh a nih theih nan mi tinten mahni chenna bul theuh tui luankawr enkawl tha a, uluk zawka leivung pawh paih tura a duh thu a sawi.

He thu hi Akashvani palai nen an inkawmna sawiin Minister chuan Mizoram chu tlang ram ruahtui tamna hmun a nih avangin leimin pawh kum tin a a awm thin thu a sawi a, khuarel chhiatna theng awm thin mahse chhiatna thenkhat chu mihringte fimkhur tawh loh vang a nih thin thu sawiin, mi tinten mahni chenna in bul tui chhe paihna enkawl that bakah leivung paih kawngah pawh fimkhur tak leh uluk zawka chet lak a ngaih thu a sawi a, mahni chenna bulhnai tui luan kawr put ru a awm leh awmlah endik pawh chhungkaw tin leh mimal tinten an mawhphurhna a ni tih hria a, chhiatna pumpelhna atana hma la theuh turin Mizoram mipui zawng zawng a chah tak meuh meuh thu a sawi bawh.



CYMA

Central YMA hotute leh NHIDCL hotupa nizan khan inkawmin NHIDCL enkawl kawngpui chhe lutuk thawm that dan tur chungchang an sawiho. NHIDCL Director, Amarendra Kumar chu nizan khan Central YMA pisa ah lengin Central YMA hruaitute nen an inkawm a. Inkawmnaah hian Mizoram chhunga NHIDCL enkawl kawngpui, a bikin Kawnpui leh Khamrang inkar kawng chhe lutuk chungchang te leh NHIDCL hnuiaia thalaite tana Skill Development Training chungchangte sawiho a ni.

Central YMA hruaitute chuan tunhnaia Mizoram chak lakna kawngpui, Kawnpui leh Khamrang inkar kawng chhe lutuk chu a siamthat hna chak taka thawk tura an beisei thu leh hemi chungchangah hian Union Minister of Road Transport & Highways Nitin Gadkari hnenah hma la tura ngenna an thawh thu an sawi bawh.

Inkawmnaah hian Central YMA hruaitute - Pu Lalmachhuana, President, Prof. Lalnuntluanga, Vice President, Prof. Malsawmliana, General Secretary leh Pu MS Ralte, Finance Secretary te an tel a ni.



DRUGS SEIZED

Excise & Narcotics Department leh Assam Rifles tangkawpin tunhnai khan Methamphetamine thahnem tak an man.

Excise & Narcotics Department leh Assam Rifles chuan July ni 23 zan dar 7:30 khan Zote – Bulfek kawng pui, Champhai District-ah Methamphetamine Kg 1 & gram 110 (Tablet 10,100) leh a neitu nia puh Lalfakawma (kum 27) Dampui, Myanmar, tuna Champhai Kanan vanga khawsa mek nia inchhal chu an man a, nimen July ni 24 khan Tuikhuahtlang, Aizawl-ah Methamphetamine Kg 1 & gram 972 (Tablet 20,000) leh a neitu nia puh mi pathum – Taj Uddin (kum 22), Mahub Hussain (kum 21) leh Halal Uddin (kum 21) mi te chu an man a, nimen vek khan Champhai District-a Tualte khuah Methamphetamine Kg. 5.555 (mum 50,500) leh a neitu-a puh Rochharliana (kum 30) Dilkawn, Champhai District-a khawsa ni-a inchhal an man bawh.

Methamphetamine vanga mante hi The Narcotic Drugs & Psychotropic Substances Act, 1985 tlawhchhanin thubuai siamsak an ni a, Court-ah hruai nghal an ni. Excise & Narcotics department hian tun hnaiah dan bawhchiaa zu siamtute zu siamna hmun dapin zu bilh lai leh zu siam sa an tichhe nasa hle a, Kuminah Rakzu liter 41,222 man tawh a ni a, zu bilh lai Tin 79,444 tihchhiat a ni tawh bawh.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Zanin dar 6 leh a chanve-ah Chanchinthar puan leh a ni ang.



AKASHVANI & DD

Union Minister of State for Information and Broadcasting leh Parliamentary Affairs, Dr. L. Murugan chuan ramchhunga Akashvani leh Doordarshan tihchangtlun nan leh tihzauh nan sawrkarlaipuiin hma ala mek a ti.

Union Minister chuan Lok Sabha-a thu a sawi naah, Sorkar laipui scheme, Broadcasting Infrastructure and Network Development (BIND) hnuaiah Akashvani leh Doordarshan-te tihchangtlun a ni dawn a ti a, he scheme hi kum 2021-26 chhung atan cheng vaibelchhe 2,539.61 sen tura ruahman leh pawmpui a ni tawh a ni a, he scheme in a ngaihpaawimawh zual te chu hmaraw hlui thlak, chanchin thehdarh kawnga hmarua te tihchangtlun, studio leh transmitter te tihchangtlun bakah technology thar hman a ni.



PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 123-na tur a ni ang. He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

